

唐  
紹儀傳略

MG

kaz)=6

70



3 2174 0254 8

## 唐紹儀傳略

禪那著

唐紹儀廣東香山縣人父某商於美國頗饒於資同治十二年曾國藩李鴻章奏請選派幼童赴美肄業是爲中國派遣學生出洋之始紹儀年十三被選出洋光緒十一年監督吳某以學生等不受約束文呈北洋大臣謂學生等鼓吹無父無君之說即使學成歸國必成叛亂其謹厚者沾染洋風久忘祖國適爲中國害請概與撤回李鴻章請於朝立命全數撤回皆至天津時天津有電報學堂醫學堂威海衛有水師學堂乃分置各學堂肄業而紹儀不至其戚香山陳某爲駐朝鮮商務委員紹儀往朝鮮遂充稅關某洋員記室紹儀初不習中文既居朝鮮乃問業於某朝鮮人遂粗通文字久乃能作牋牘書法仿黃山谷朝鮮人所授也值朝鮮亂事今總統袁公方駐師朝鮮聞變率兵入護商務委員遙見一少年騎馬挾槍護陳委員而出卽唐紹儀也袁公壯之談甚洽約爲兄弟及紹儀入爲侍郎不敢抗袁公尊始以師禮事袁公也袁公旋充駐朝

鮮商務總辦約紹儀爲之佐至相善甲午中日之役鴻章主和議袁公屢請戰不許乃請歸舉紹儀自代力爲袁公善其後袁公德之和議成紹儀歸於天津鴻章歷聘歐美以紹儀從鴻章爲粵督紹儀從至粵張之洞督兩江梁敦彥久在幕府薦紹儀於之洞之洞一日十餘電促紹儀行至江甯連謁不得見居一月紹儀憤甚遽歸滬之洞聞紹儀行電命江陰礮台以兵艦邀之江促其還甯紹儀不可兵官哀求切乃允至滬稍息卽歸兵官據以聞及船抵滬而滬道已奉十餘電促紹儀乃勉還甯謁之洞之洞謂少年何不能忍耐乃爾紹儀謂中國所以積弱者忍耐誤之也與之洞論不合派洋務局會辦一月而歸戊戌康有爲變法取密旨召紹儀紹儀不至張翼督辦路鑛以紹儀充鑛務總辦繼兼充山海關內外鐵路總辦庚子拳變紹儀方居英租界鑛務局而直督裕祿方以兵攻租界流彈落局中紹儀妻張氏及一女斃焉紹儀帛書致華軍訴所苦爲英軍邏得之詎紹儀居租界通敵軍以兵捕紹儀行德人某力援之得不死

及紹儀貴德人死乃歲贍其家袁公爲山東巡撫調紹儀赴東以候補道兼九  
要差山東某教公案數年不結紹儀至閱數月議遂定拳變起袁公剿之嚴境  
內無拳匪迹紹儀實贊助之鴻章歿袁公代爲直隸總督以紹儀補天津海關  
道時袁公駐保定紹儀駐京與各國公使議接收天津議既定袁公命紹儀收  
津紹儀乃迎袁公於保定新政繁興紹儀皆與籌議其權力實代表袁公焉時  
朝廷倚袁公大事必咨之袁公恒商諸紹儀日俄戰役東三省中立因應二國  
紹儀有力焉英國兵踞拉薩駐藏大臣有泰辱國擅許約朝廷將命專使入藏  
與英議改約瞿鴻禨方長外部與袁公不協以紹儀助袁公抗外部思去紹儀  
因言藏事重大非深明外交有材略者不足勝任宜莫如紹儀乃晉紹儀三品  
京堂加副都統銜充印藏議約全權大臣命下袁公愕然紹儀尤不樂行袁公  
電言北洋正資贊助請別遣重臣往不許紹儀以不習藏事思得有學望者輔  
之擬保于式枚爲副式枚辭乃挈張蔭棠梁士詒行駐印度數月迭開議印度

總督持之堅紹儀亦堅不讓乃自劾請撤回謂外交故事常有互議不協撤使則易轉圜屢電請歸鴻禩笑曰此唐某急欲歸國乃比增故事耳紹儀屢電奕劻袁公乞歸袁公言於奕劻曰藏事既難就範急則愈受損蓋緩之日俄休戰東三省方待訂約非紹儀歸不可乃召還授太僕寺卿紹儀以藏事付張蔭棠挈梁士詒歸轉商部左丞時載振爲商部尙書方力削盛宣懷權乃以紹儀充督辦京漢鐵路大臣日本派專使小村壽太郎來議東三省約朝廷派奕劻瞿鴻禩及袁公與議實專倚袁公袁公挈楊士琦鄒嘉來及紹儀從實專倚紹儀也約既成日人深詬小村失敗紹儀遂進外務部侍郎時伍廷芳方在外部紹儀素輕之袁公在東撫植庚子之變以廷芳在美屢以外情電告甚重之屢薦諸朝至爲侍郎皆袁公力也及廷芳官外部恒不附袁公論外事亦恒不合及紹儀至袁公乃舉紹儀代廷芳改廷芳法部侍郎數月廷芳遂告歸矣滬甯鐵路舊爲盛宣懷督辦叢弊深蘇人多攻之唐文治爲商部侍郎載振業師也載

振使英歸文治爲撰使英日記及設商部法制均文治手定至是請撤宣懷督辦欲以畀參議王清穆奏上奕劻以授紹儀蘇人成大恨滬甯路事之達商部者清穆等恒陰持之紹儀不得行其志告奕劻出清穆爲邊省臬司清穆謝病歸蘇人怨紹儀益深侍讀吳郁生臚陳滬寧積弊嚴劾紹儀詔紹儀回奏紹儀覆奏抗辯語侵郁生朝廷置不問怨乃愈結矣紹儀不喜士大夫尤好詆名士以爲談資張謇鄭孝胥湯壽潛等皆紹儀所輕者也尤好詆張之洞謂中國事皆張佩綸吳大澂輩敗之苟名士復得志將不國矣瞿鴻禨陰鷲老於事屢司文柄門生尤衆汪康年張元濟等皆其門下士而東南輿論有力者也奕劻以首輔兼管外部深倚紹儀那桐爲外部會辦亦拱手讓之鴻禨忌之深紹儀以外部司員出身科甲惜於外事不習外國語他日必悞外交乃設儲才館集通外國語及曾隨使外國者練習之儲使才之選鴻禨召張元濟使充總辦紹儀弗善也元濟至手訂章程紹儀概抹勒之元濟薦溫宗堯李家鼐襄館事紹儀

概拒之元濟憤甚遽辭去士論乃益詆紹儀矣紹儀內附奕劻外倚袁公權勢震一時使臣更迭及外任之選補多所薦引朝端側目焉五大臣歸國議改官制袁公被召入朝主其事時滿人懼失權恣其謗毀內監聞議裁爭自危日謀浸潤於孝欽后又議裁御史衙言官大憤爭上書論官制草案之謬漢大臣懼以老朽見棄并肆非議袁公乃急還鎮不數日改定官制之命下舊制部滿漢兩尚書四侍郎新官制設內閣總理一副總理二部尚書各一侍郎各二袁公既被謗行官制事皆鴻機王之洎命下各部均依新制軍機處仍存不廢軍機大臣三人如新制正副總理之數而鹿傳霖鐵良徐世昌皆出樞垣各部尙書均兼政務大臣僅逢二日赴內閣會議與政府不相連屬皆鴻機謀也郵傳部新設以紹儀久筭路政乃改紹儀郵傳部侍郎而以張百熙爲尙書汪大燮補外務部侍郎時方在美使任未歸紹儀仍兼署外部郵傳事方章胤而百熙儒臣未習輪電路郵四政百熙素謙拙又素重紹儀當辛丑英皇加冕百熙奉命

赴英充賀紹儀方以候補知府閒居滬上百熙奏調紹儀充隨員紹儀辭而百熙旋被召赴行在使英不果行及同任郵傳紹儀亦以百熙長者樂共事後乃齟齬初外務部商部學部丞參官均由本部指名奏簡至是郵傳部擬補丞參百熙重時望欲舉張謇湯潛鄭孝胥張元濟紹儀重實驗欲舉梁如浩周萬鵬鍾文耀施肇基百熙謂丞參職在討論籌策宜有規畫全局之才實驗家偏於一方宜領一局實施其效紹儀謂名士空談動輒敗事堅持不可百熙乃欲雜用之紹儀仍堅拒樞臣瞿鴻禨欲授朱啓鈴百熙已諾之矣而紹儀仍持不可鴻禨益銜之其後百熙舉陳昭常紹儀舉施肇基奕劻更以那晉授之遂以陳昭常補右丞那晉補左參議施肇基以候選道署右參議都下大譁肇基以留美畢業生先捐候選道是年六月試得進士十月卽游參議時論以驟進詆紹儀挾私并詆百熙巽懦東南輿論益囂然矣肇基本紹儀同房兄女婿以便潛爲紹儀所喜及紹儀督辦京漢鐵路以肇基充京漢總辦至是排衆謗而用



肇基都御史陸寶忠欲揭參之百熙爲之調停使肇基走謁寶忠事乃寢待讀馬吉樟劾紹儀濫用私人謂昭常爲其同鄉狎友肇基是其姪女婿以道員濫授三四品京卿乞罷昭常肇基而罪紹儀朝旨均令昭常肇基開缺而責紹儀瞿鴻禨既深恨紹儀兼不嫌於百熙百熙與鴻禨同鄉姻戚又同學同年而聲名出鴻禨上鴻禨夙忌之鴻禨與百熙同被召西安行在將令百熙入樞府百熙至卽痛陳朝政之誤請興新政皆孝欽后榮祿所弗善也而鴻禨善伺旨遂被命入樞廷而百熙方力陳興辦學務乃命百熙爲管學大臣鴻禨在樞府屢詭百熙百熙性坦直不爲防而紹儀有所計畫不告鴻禨而直告奕劻百熙則時以語鴻禨意氣益相左矣鴻禨以張唐不協入告意欲傾紹儀且警百熙也奉旨切責百熙紹儀百熙自以廿年禁近禮遇優隆忽被嚴責爲終身之羞既屢詭於鴻禨鬱不能宣寢疾誤藥遂卒紹儀既不安於朝思外任適東三省改設行省令徐世昌爲東三省總督朱家寶爲吉林巡撫段芝貴爲黑龍江巡撫

世昌以奉天當交涉之衝請以紹儀補奉天巡撫而朱寶奎代爲郵傳部侍郎  
甫蒞任而岑春煊補郵傳部尙書劾寶奎貪劣褫職去蓋任侍郎甫七日也奉  
撫於官制爲次官總督常駐奉天獨裁奉撫之權恒不逮吉黑紹儀之官除力  
任日俄交涉外餘事多不置辭濟中呼爲伴食中丞紹儀蓋藉此自晦也鴻機  
旋以曠使言官交通報館被學士惲毓鼎劾去毓鼎以十餘年學士不轉一階  
實忤奕劻也或教奕劻利用毓鼎劾去鴻機以藩司酬之士論沸騰開藩之議  
遂罷袁公與張之洞同入樞府之洞深惡紹儀紹儀不得爲尙書總督之洞扼  
之也梁敦彥爲外務部侍郎力主聯美之說奕劻及袁公均納其議敦彥自請  
行袁公方倚敦彥辦外交不欲其行敦彥請召紹儀代已乃召紹儀於奉天紹  
儀至又不欲在外部自請赴美奉命紹儀行以考察幣制爲名挈陳錦濤等行  
奕劻次子載撻欲藉出洋歸得政權乃由紹儀奏調充參贊奏調親貴前此蓋  
未有也聯美之舉日人所最忌紹儀旣銜使命留京久日人早偵知之先與美

聯盟紹儀至美日約已成矣時論爭咎紹儀稽延失機紹儀既歷聘諸國忽遭兩宮大喪醇親王載灃攝政罷袁公歸里紹儀乃亟請歸比至解奉天巡撫職以侍郎候補紹儀乃告歸當奉使時所費逾侈多貸諸歐美各銀行及歸朝局已大變既不得於攝政王張之洞又在樞府尤深惡之所費多不敢報銷既閒居天津乃鬻產以償之紹儀幼爲富商子性極揮霍及漸貴而家業已蕩盡紹儀自朝鮮歸卽歷充鐵路礦務等差及任津海關道蓋最優缺也津關道在庚子前歲入四十餘萬庚子後所入銳減然猶十餘萬紹儀在任仍不足用則貸諸外國銀行及任印藏全權使臣任外務部侍郎兼京漢滬寧鐵路督辦大臣帮辦稅務大臣歲俸所入共二十餘萬任奉撫歲入亦十餘萬仍時負債紹儀以豪奢著於全國自奉過於王侯時論多訾之及閒廢憤懣臥病乃盡散僕役諸姬亦星散鬻地產以償逋負猶不能盡償閉門謝客蕭然如老僧病稍減乃歸於粵香山縣之唐家村布衣草笠日與野老游或攜村童登山樵采以攄鬱

結焉時徐世昌自東三省總督內召爲郵傳部尙書厚自結於載洵載濤洵濤深護持之大學士戴鴻慈卒遂以世昌入閣盛宣懷初附於張之洞得補郵傳部侍郎甫至未卽任奕劻遽舉沈雲沛代之出宣懷仍爲商約大臣駐滬上及載澤以降裕太后內親怙權脅攝政王宣懷附於載澤仍召宣懷至則連召見三日時論均謂將爲郵傳部尙書矣載濤歸自德國力陳國勢之危思去奕劻改造政府不可得則引毓朗世昌入樞廷圖改革舊政復力保紹儀代世昌爲郵傳部尙書紹儀未至以沈雲沛署尙書雲沛以商部右丞本官署尙書蓋創例也宣懷任右侍郎在雲沛下意不適雲沛本附奕劻又深自結於載濤氣張甚宣懷不能堪而陽將順之紹儀至官雲沛轉左侍郎宣懷敬事紹儀無敢忤方宣懷爲工部侍郎督辦鐵路時紹儀以候補知府當鐵路差雲沛以舉人就書記至是皆居宣懷上宣懷並曲就之紹儀以朝政多門勢甚孤之任一月但畫諾耳會繼至鄭病卒紹儀哀甚鄭朝鮮人絕麗而端淑紹儀奇愛之數年前

鄭病重紹儀常自矢若婦死決不作官至是哀極而病居天津請解職載濤世昌均屢使促之紹儀決不起乃解任雲沛方自料必授尙書而宣懷已挾載濤力攫得之改雲沛吏部侍郎是時奕劻載濤權力互爲消長監國特傀儡耳紹儀辭職之日奕劻適以小病在假載濤遂舉宣懷爲尙書雲沛既被擠憤抑大病幾殆與宣懷隙益深矣紹儀本與宣懷夙怨及同官宣懷力交歡紹儀紹儀深防之知宣懷謀益急乃決讓宣懷借婦喪去位怨亦稍稍解矣先是宣懷爲侍郎時御史趙熙揭參鐵路局長梁士詒語涉紹儀雲沛密旨交宣懷查辦及宣懷爲尙書乃奏撤士詒鐵路局長仍留郵傳部左參議聽候查賑士詒爲紹儀要人奕劻載濤皆庇之宣懷乃不敢過迫士詒會改造內閣宣懷爲郵傳大臣力主鐵路國有川鄂湘粵並收爲官辦川人首反抗宣懷持之堅奕劻那桐徐世昌均弗善也載濤力庇宣懷持益急川亂遂發不半月而鄂難作陸軍大臣蔭昌視師於鄂朝廷旋召還蔭昌命袁公代督師張紹曾駐兵灤州以十九

條迫朝廷遂頒布十九信條而親貴不得列政務同時辭職朝廷命袁公爲內閣總理大臣袁公至組織內閣以紹儀爲郵傳大臣紹儀不履任以楊士琦署理紹儀贊助袁公若內幕力主和議自鄂變起不兩月東南十餘省相繼獨立紹儀走謁奕劻諷清帝讓位奕劻斥之紹儀乃徧訪各國公使徵意見各國多盼和成紹儀既幼歷美國心醉共和政體憤清政之腐敗思乘勢推倒之屢陳於袁公袁公未遽允紹儀謀益急粵人汪兆銘以謀炸攝政王被繫詔獄及鄂變作粵督張鳴岐請釋兆銘並請大用兆銘既出獄屢走謁紹儀紹儀爲介見於袁公時北軍餉絀袁公命陳錦濤商借外債未就馮國璋敗黃興於漢陽黃興遁漢陽復歸北軍漢口英領事介請停戰而南軍適破南京汪兆銘通南北軍之郵請申和議紹儀請調馮國璋還統禁衛軍蓋禁衛皆旗人慮梗和議其將佐皆國璋門人惟國璋能戰之也紹儀復諷各國公使示意請攝政王退位奕劻請諸隆裕太后隆裕久不懶於攝政王因奕劻言許之攝政王既自請退

位袁公遂定言和之議命紹儀赴漢口議和南軍舉伍廷芳代表而英使遣員與偕紹儀遂南行初楊度主君主立憲政體汪兆銘主民主共和政體同發起中國共進會於天津時南方皆主民主共和北方多主君主立憲紹儀南行楊度汪兆銘皆從紹儀至漢黎元洪使孫武告紹儀謂伍廷芳等不願至漢請移滬議紹儀乃曲就之比至滬衆論謂主持君憲者當誅絕之爭謀狙斃楊度楊度乃遁還紹儀至之日滬中以爲北使必持君憲揚言必斃紹儀紹儀懼甚寄居英人某家及定期開議廷芳相約僅代表一人發言紹儀僅挈許鼎霖歐廣祥馮懿同從歐馮皆書記也廷芳首言今民心已併向共和如非同意可無庸開議紹儀言吾本贊成共和特北方未盡同意耳廷芳言君既稱全權當能代表北方若以北方未盡同意爲辭亦可無庸開議紹儀已偏注南方特未公言之紹儀屢電袁公力言無商量之餘地袁公持之堅梁士詒在袁公幕紹儀屢電士詒婉勸袁公士詒力助紹儀時衆論多主召集國會待公決袁公乃以入

告奉旨無私天下之心命召集國會公決國體孫文居美洲聞革命軍起力鼓吹之海上諸報章爭言華僑好義集軍費七千餘萬南軍饒奇繼程德全乃首倡迎孫文歸冀得鉅款濟軍及孫文垂橐而至衆大失望時南方議舉大元帥建新政府於南京黃興方在滬乃舉黃興爲大元帥黎元洪爲副元帥浙江首反對乃改舉黎元洪爲元帥黃興爲副元帥元洪不能離鄂以黃興代建政府黃興辭焉及議舉總統黃黎莫能相下適孫文至馬君武胡漢民等皆稱孫文鼓吹革命之功要衆舉焉孫文遂以十七票舉爲臨時大總統改陽曆稱中華民國元年建新政府程德全伍廷芳張謇湯壽潛陳錦濤諸清吏并列國務員皆就職於南京楊度既歸京師乃與葉恭綽梅光羲等共發起共和促進會時郵傳副大臣梁如浩不至梁士詒署副大臣楊士琦留滬不歸士詒遂署郵傳大臣士詒與署外務大臣胡維德贊襄帷幄紹儀南行後維德時往來於各使署觀各國意向及南中舉總統袁公乃電詰責紹儀紹儀方與廷芳議定四條



紹儀簽押電告袁公袁公電撤銷代表與廷芳直接電商紹儀名爲撤銷代表  
實陰主持之時密電士詒力爲贊助北將始極激昂力請戰袁公密諭諸將使  
贊成共和而段祺瑞姜桂題張勳曹錕倪嗣冲王占元等連名請共和乃議優  
待皇室條件往復數四隆裕太后毅然許之乃於宣統三年十二月二十五日  
宣詔遜位帝政告終南方以北方軍非袁公不能鎮撫共謀舉袁公爲總統實  
不得已也清帝遜位詔下羣議一致舉袁公爲臨時大總統衆議謂袁公梟雄  
不可測若用美國制總統負完全責任恐日趨於專制因議采法國制設內閣  
總理代總統負責任紹儀既大盡力於南方衆議舉紹儀爲總理南政府議廢  
北京迎袁公南來就職派蔡元培充專使迎袁公紹儀亦奉孫文命偕元培至  
被命爲國務總理袁公力主都北京紹儀至則勸袁公姑赴南京就職以順南  
方之意會第三鎮駐衛京師兵猝變元培等被掠次日與紹儀同避於東交民  
巷衆論謂兵新變北方危袁公萬不宜南行皆諍元培元培電告南京謂臨時

期內可暫仍都北京他時付國會議之南政府不得已諾之袁公乃就任於北京當兵變後京師商業并歇極蕭條就任亦殊草草就任誓書致南京託孫文代蒞參議院宣誓參議院復電詰誠袁公恪遵約法若大詰也元培等先歸紹儀繼南行接受南政府而先謁副總統黎元洪於武昌紹儀至南京組織內閣成孫文黃興介紹儀入同盟會紹儀久留南京不行南京政府久不解散爭阻北行時南北兩總統兩政府各省通電皆並稱孫袁也紹儀留南京月餘袁公屢電嚴切促歸而紹儀受逼於南中方議命王芝祥率桂軍北來請以王芝祥督直隸胡瑛督山東柏文蔚督河南袁公不可紹儀以去就爭之袁公復電謂如不相諒則吾亦請解職而已紹儀不得已乃北還以內閣成立布告各國初紹儀以四國借款要挾過苛思改借比款以抵制之乃借比款一千萬磅四國恚之遂加入日俄兩國爲六國借款團嚴詰紹儀比款遂不續借及自南還比款已罄用途不能宣布借款團與紹儀議要素苛外交團不嫌於紹儀及財政

長熊希齡至乃續議壽時輿論多致紹儀紹儀不樂思引退六月二十四日晨  
興獨往天津譚傳總理遁袁公命梁士詒段祺瑞赴津促之還京紹儀意益堅  
決不起乃上辭職書准解任蓋就職僅五十六日也紹儀自喪婦後臥病久又  
連喪子女三及出任國務志亢而事與願違氣益消沮退休後盡倦於世事矣

78.  
026==

SKBC  
MG  
K827-6  
70